

پولس رسول دومته نومه قرنتيان ٺبه

١ بي خبر بيبين. چون فشاروئي که آمه سر بومه
 بيشتر از آمه طاقت بو که آمه زنده مونس
 اجي نااميد بوئيم. ٩ راس راسه امٺه ايطو بو
 کي اينگار امه مردن ٺبه محکوماگودن. ولي
 ايشون همه اين وسه اتفاق دکتہ که نه امه،
 بلکه خدا توکل بکونيم که بمرده ان زنده
 واکوئنه. ١٠ خدا آمره ابي جور خطر جي کي
 کوشنه رهايي بدا و رهايي دئنه. آمه اميد به اونه
 که هندئرام خا امه رهايي بدی، ١١ شمراُم خا
 امه شيمه دوعا آمره ياري بدین، تا خيلين امه
 خاطري شکر بکونن، او برکت واسی کي در
 جواب دعای خيلين، امه هدا بوبو

پولس برنومه ٺان عوضابنه

١٢ چون امه ايفتخار، امه وجدان ايسه که
 گواي دئنه که ای دنيا مٺن روراستی و صاف و
 صادق هما که خدا ياجي ايسه رفتار بوديم، نه
 آدمي حکمت همرا، بلکه خدا فيض همرا رفتار
 بوديم علی الخصوص شيمه همره. ١٣ چونکه
 امه جوز او چيزی که شمه خوئين و فهمين
 شيمٺه ننويسنيم. و مو اميد دانم شمه اينه
 خوب بفهمين. ١٤ هوتو که شمه امه کم و
 بيش بشناختين، تا امه خداوند عیسی روز
 ميئن شمه آمره فخر بکونين، اوجور که امه
 شيمه واسه فخر کونيم.

١٥ چون اين اجي مطمئن بوم، خواستم اول
 شيمي ورجه بام تا دومرته فيضه تجربه بکونين.
 ١٦ مو خواستم می راه سر مقدونيه منطقه بام

١ پولس جي که به خدا خواسته مسيح
 عیسی رسول ايسه، و آمه برار جي
 تیموتائوس،
 خدای کلیسا به قرنتس شهر ميئن و همته
 مقدسين، سرتاسر آخائيه ولايت به:
 ٢ امه پٺر، خدا طرف جي و خداوند عیسی
 مسيح طرف اجي، فيض و سلامتی شيمٺه
 بای!

خدای تموم تسلی ٺن

٣ متبارک ببي خدا، آمه پٺر خداوند، عیسی
 مسيح، که رحمتون پٺر و تموم تسليئن پٺر
 ايسه؛ ٤ او خدا که آمره تموم امي مصيبتون
 مٺن تسلي دئنه، تا آمرم بتونيم اوشونيه که
 مصيبتون مٺن ايسان، با او تسلي که اونا جي
 هيٺيم، تسلي بدیم. ٥ چون هوطوکه مسيح
 عذابون جي فت فراوون سهم بٺنيم، هوطورم
 به واسيطه مسيح تسلي، فت و فراوون سهم
 بٺنيم. ٦ اگه امه مصيبت ميئن ايسايم، شيمه
 تسلي و نجات واسی ايسه، و اگه تسلي دانيم،
 شيمه تسلي وسه ايسه، و ابي کارگر دکننه او
 وخت که شمه او عذابونه که آمه کشنيم صبر
 و حوصله آمره طاقت آيٺنن. ٧ آمه اميد شيمه
 باره پابرجا ايسه، چونکه دوٺنيم هوطو که آمه
 عذابون ميئن سهم دٺنن، آمه تسلي مٺن ني خا
 سهم بدارين.

٨ چونکه ای برارون، نخوانيم او مصيبتون
 جي که آسيا منطقه ميئن آمه سر بوگذشته،

شمره غصه داراكونم، بلکه تا بودونين چنی زياد
شمره دوست دانم.

گناهکاره ببخشين

٥ ايسه اگه ينفر غصه باعث بې، نه فقط
مه - بلکه - اگه نخوام هچې بوگوؤم - کم و بيش
شمره همتۀ غصه داراگوده. ٦ چون ای جور
ادم ټبه ای مجازاتی که شيمه بيشتری اونه
سزاوار بودونسين، پس ايسه. ٧ پس ده بآه اونه
ببخشين و ديلداری بدن، نبی که زيادی غصه،
اونه تودی. ٨ پس، شمراي خواهش کوئنم
اونه شيمه محبتای مطمئن بکونين. ٩ چون
اينه وسه شيمه بنويشتم که شمره ايمتحون
بکونم و بينم که هر دستور جی فرمون بئنين
يا نه؟ ١٠ هرکسی که شمه ببخشين، منم اونه
بخشتم. و راس راسه اگه ينفر ببخشيم - البته
اگه دليلی بخشين به هننای - مو شيمه واسی
مسيح محضر ميئن ايطو بودم، ١١ تا شيطون
أمره گول نزي، چونکه امه اونه فتنه ثان جی
بی خبر نيم.

پيروزی مسيح ميئن

١٢ وختی تروآس شهر بوشوئم تا مسيح
انجيله موعظه بکونم، با ای که خداوند اوره
يکته پيله دروازه می جلو واگوده، ١٣ ولی هنده
آروم و قرار نداشتم چونکه می برار تيتوس
نياتم. پس او آدمون أمره خدافضی بودم و
مقدونيه منطقه بوشوم.

١٤ ولی خدايه شکر که هميشه مسيح ميئن،
او خوشه پيروزی ميئن امره راهنمایي کونه و
اونه دونایي عطره بواسيطه أمة همه جا بخش
کوئنه. ١٥ چونکه امه خدا به بوی خوش مسيح
ايسيم، چی نجات بپاژن ميئن و چی اوشونی
ميئن که هلاک بن. ١٦ ينفر به مرگ بی دننيم

و شمره بينم، و مقدونيه اچي هنده شيمه ورجه
وگردم تا مه يهوديه ولايت طرف راهی بکونين
. ١٧ مگه وقتی کی خواستم ای کاره بکونم دو
دیل بوم؟ مگر مو آدمی فيکرون همره تصميم
گينم اوجور که یک دم هم بوگوؤم بله بله، و
هم بوگوؤم نه نه؟

١٨ خدا وفاداری سر قسم که امه گب شيمه
امره بله و نه نبو. ١٩ چ نکه چونکه خدا ريکه،
عيسى مسيح، که من و سيلاس و تیموتاؤس
اونه شيمه مئن اعلوم بوديم، بله و نه نبو،
بلکه اون ميئن هميشه بله ايسه. ٢٠ چونکه
تموم خدا وعده ان عيسى مسيح مئن بله ايسه.
هينه واسه بواسيطه اونه که امه آمين گونيم
تا خدا جلال بياچي. ٢١ و خدا ايسه که امره
شيمه امره مسيح مئن برقرار کوئنه. و او أمره
مسح بوده ٢٢ و او خوشه مهره أمة سر بزه و
خو روح يکته بيعونه مورشون أمة ديلون ميئن
بنا.

٢٣ خدا گواه گينم که فقط اين وسه که
شمره ناراحتانکونم قرنتس ونگرسم. ٢٤ نه
اينکه شيمه ايمون سر آقاي بکونيم، بلکه
شيمه أمره و شيمه شادی به تقلا کوئنيم، چره
که ايمون ميئن قايم ايساين.

٢ چونکی تصميم بيتم دومرته شيمه ورجه
نام تا شمره غصه دار نکونم. ٢ چونکه
اگه شمره غصه دار بکونم، ده کی تينه ما
شاداكونی، جز شمه که شمره غصه داراگودم؟
٣ مو نومه یک طوری شيمه به بنويشتم تا
او وختی که أمئدرم شيمه ورجه، اوشونی که
باء مه شاد کونن، می غصه باعث نبون.
چره که همته شمره اطمینون داشتم که می
شادی شيمه همته شادی ايسه. ٤ چونکه خیلی
غم و غصه همرا و بشکسه ديل و ارسودکته
چوشمون هما شيمه به بنويشتم، نه اينکه

بواسيطه خدا روح ايسه جلال همرا ايسه. ۹ چونكه اگه خدمتي كه محكومابون ختم بؤ جلال همرا بو، چني ويشتر خدمتي كي صالح بؤنه رسنه ويشتر جلال دانه. ۱۰ چون او چي كي يه زمت پورجلال بو، ايسه در مقايسه با اي جلال كي سرتره، ده جلالی ندانه. ۱۱ و اگه او چي كي نابودابؤ جلال همرا بو، او چي كي باقي مونه چني ويشتر جلال همرا ايسه.

۱۲ پس چونكي اي جور اميد دانيم، جرأت هما گب زئنيم، ۱۳ نه موسی مورشون كي يكته نقاب خوش ديم سه هكشئه تا بني اسرائيل آخريس او چئه كه از بين شودبو، نين. ۱۴ ولي ايشون فيكرون تاريكبو چونكه هو نقاب عهد عتيق خوندن زمت تا ايمرو باقي بومونسه و ويته نوبو، چونكه هچي فقط مسيح مئن خا ويته بون. ۱۵ حتی تا ايمرو، هروقت كي موسی توراته خونن، يكته نقاب اوشون ديل سه قرار گينه، ۱۶ ولي هر وقت يگ نفر خداوند ورجه وگرده، نقاب ويته بنه. ۱۷ خداوند، روح ايسه و هرجا خداوند روح ديون، اوره آزادي هننا. ۱۸ و تموم امه كي بي نقاب ديم همرا، خداوند جلاله، يكته آينه مورشون نيگا كونيم، هو شكل مورشون، جلال اچي يكته جلاله كي ويشترابنه عوضابنيم؛ و اي خداوند اچي شروع بنه كي روح ايسه.

انجيل نور

۴ پس چون او رحمت واسی كي امره هدا بوبو ايجور خدمت كادريم، نااميدانبنيم. ۲ بلكي خلوتي راهون و شرم آور راهون اچي دوري بوديم و قاببازی هما جلو نشنيم، و خدای كلومه دسكاری نوكونيم، بلكي حقيقته آشكارا گونيم و تقلا كونيم خدا محضر مئن همه كس وجدون مئن تصديق ببيم. ۳ حتی اگر

كه مرگ سو شنه؛ ينفر ديگر به زندگي بي دننيم ايسيم كه زندگي سو شنه. كيسه كه ايجور چيئن لياقته بداری؟ ۱۷ چونكه امه او ادمون مورشون نييم كه منفعت واسی خدا كلوم فورشنن، بلکه امه خدای چشمون جلو، مسيح ميئن گب زئنيم. او ادمون مورشون كي خالص نيتون دانن و خدا طرف اچي ايسن.

تازه عهد خدمتكارون

۳ مگر هندئه بناگوديم امراچي تعريف گودن؟ يا اي كه امه احتياج دانيم بعضئن مورشون شمره سفارشنومه هديم يا شمراچي سفارشنومه هگيريم؟ ۲ شمه خودتون امئه سفارشنومه ين، يكته نومه كه امئه ديون سر بنويشته هننا كه همه ته تينن اوننه بوخونن و بشناسن. ۳ شمه نوشون بداین كي مسيح نومه ايسين، كي بواسيطه امه شمره برسئه، كي مركب اچي بنويشته نوبو، بلكي خدای زينده روح هما بنويشته بوبو و نه سنگي لوح سر، بلکه آدمون ديون لوح سر بنويشته بوبو. ۴ امه مسيح خاطريه كي ايجور ايظمينون خدا محضر مئن دانيم. ۵ نه كي خودمون لياقت بداريم كي ايدعا بوكونيم كه امئه دس اچي يك چي بر انه، بلکه امئه لياقت خدا ياجي ايسه. ۶ خدا بو كه امره لياقت هدا تا تازه عهد خدمتكارون ببيم، عهدي كي خدا روح سر برقراره، نه او چي سر كي يكته بنويشته ويسته نئه. چونكي بنويشته كوشنه، اما خدا روح زيندي بخشنه.

۷ ايسه، اگر او خدمت كي مرگه ختم بؤ و سنگي لوح سر حك بوبوبو، جلال همرا ظهور بوده اوجور كي بني اسرائيل مننيسن موسی ديم جلال واسی اوننه نيگا گودن، هرچند او جلال از بين شودبو، ۸ چندی ويشتر، او خدمتي كي

روز تازه ترابؤدره. ^{١٧} چونکه امئه ای کوشتای و زودگوزر رنجون امئبه ابدی جلال ارده دره که او رنجون هما برابری نوکونه. ^{١٨} پس او چئه کی شانه دئن نیگا نوکونیم، بلکه او چئه کی دئه نشانه چوشم وادوجنیم، چونکی دئیئن زودگوزره، اما او چئن کی نشانه دئن ابدیئه.

امئه آسمونی خونه

ایسه دونیم هر وقت ای خیمه یعنی امئه **٥** زمینی خونه که اون مئن زندگی کادریم فگرده، خدا یاجی یکتہ عیمارت دانیم، یکتہ خونه کی دس اجی چاگوده نوبو و آسمون مئن ابدی ایسه. ^٢ حقیقتا کی ای خیمه مئن آه کشنیم، چونکی اون مشتاقیم که امئه آسمونی خونه یکتہ رخت مورسون دوکونیم ^٣ اگر که راس راسه اون دودن هما دئه لوخت نبنیم. ^٤ چون تا او زمت کی ای خیمه مئن ایسایم سنگین بار همرا آه کشنیم، نه این واسئه کی لوخت بنیم، بلکه ویشته بپوشونئه بنیم، تا زندگی او چئه کی فانیئه فبره. ^٥ خدا ایسه که امره ای منظور واسی آماده بوده و روح القدسه بیعونه مورسون امره هدا. ^٦ پس همیشک امئه دیل گرمه. امه دونیم تا او زمت کی ای تن مئن خونه دانیم، خداوند اجی دوریم، ^٧ چونکی ایمون همرا زندگی کونیم، نه او چی همرا کی اینیم. ^٨ بله، امئه دیل حیسابی گرمه و بهتر دونیم ای تن اجی دورابیم خونه مئن خداوند همره زندگی بوکونیم. ^٩ پس چی تن مئن زندگی بوکونیم و چی اون اجی دور ببیم، امئه نیت اینه که اونه راضی بوکونیم. ^{١٠} چونکی تموم امه خا مسیح داوری تخت جلو حاضرابیم، تا هرکس بنا به خوب یا بد اعمال کی خوشه تن مئن زندگی گود انجوم بدا، سزا بینه.

امئه انجیل نامفهومه، اوشون ئبه نامفهومه که هلاکت راه مئن ایسان. ^٤ ای دوره خدا بی ایمونون فیکرونه کوراگوده تا مسیح جلال انجیل نوره کی خدا دیمه، نین. ^٥ چونکه امه امره موعظه کادنینم، بلکه اعلوم کونیم کی عیسی مسیح خداونده، و امراجی فقط عیسی خاطیری، و اونم فقط شیمئه خدمتکار موسون گب زئنیم. ^٦ چونکه هو خدا کی بوته: «نور تاریکی جی فتؤه»، خوشه نوره امئه دیلون مئن فتؤسه تا خدا جلال شناختن همرا مسیح دیم مئن، امره نوروئی بوکونه. ^٧ ولی ای گنج گلی گوله ئان مئن دریم، تا آشکاربون کی ای عجایب غرایب قدرت خدا یاجی ایسه، نه امراجی. ^٨ امه هر ور اجی سختی جیر ایسایم ولی خوردانوبویم؛ منگیم، ولی ناامید نیم؛ ^٩ آزار و اذت اینیم، ولی ویلاگوده نوبویم؛ زمین سر بکتیم، ولی کم ناردیم. ^{١٠} همیشک عیسی مرگه امئه تن مئن بئنیم تا عیسی زندگی ئم امئه تن مئن آشکار ببون. ^{١١} چون امه کی زیندهیم، همیشک عیسی خاطیری مرگ دست بسپارده بنیم تا اون زندگی امئه تن مئن که از بین شنه آشکار ببون. ^{١٢} پس مرگ امئه مئن کار کونه، ولی زندگی شیمئه مئن. ^{١٣} مزمور کیتاب مئن بما که «ایمون باردم، پس گب بزنم». هی ایمون روح همرا، امرام ایمون دانیم و گب زئنیم. ^{١٤} چونکی دونیم او کی عیسای خداونده بمرده ئان اجی زینده واگوده، امرام عیسی هما زینده واگوده و شیمئه هما اون محضر مئن خا باره. ^{١٥} ایشون همه شیمئه واسئه، تا هرقدر کی خدای فیض مردوم سر ویشتر و ویشتراینه، شکر گودنم خدا جلال ئبه ویشتر ببون. ^{١٦} پس ناامیدانبنیم. هرچند امئه ظاهر از بین شوډره، امئه باطین هر

خدمت آشتی

۱۱ پس چونکی دونیم خداوند ترس معنی چپسه، مردومه قانع کونیم. ولی او چی کی ایسیم خدای ثبه آشکاره و امید دانم کی شیمئه وجدون ثبه ام آشکار بیون. ۱۲ امه نخانیم هنده امئه باره تعریف بوکونیم، بلکی خانیم دلیلی باریم که امره ایفتخار بوکونین، تا بوتونین اوشون جوابه بدین کی ظاهیر سر ایفتخار کونن، نه او چی سر کی دیل مئن هننا. ۱۳ چونکه اگر امئه عقله از دست بدایم، خدای واسئه؛ و اگر عاقیلیم، شیمئه واسئه. ۱۴ چون مسیح محبت امره کنترل کونه، چونکی بفهمسیم: که یک نفر همه ته واسی بمرده پس همه بمردن. ۱۵ و او همه ته خاطیری بمرده تا اوشون ده خوشون واسی زیندگی نوکونن، بلکه اون ثبه زیندگی بوکونن که اوشون ثبه بمرده و زینده وabo. ۱۶ پس امه ده بعد ای هیکسه مطابق جسم نشناسنیم. هرچند پیشته مسیحه مطابق جسم شناختیم، ایسه ده ایطو نئه. ۱۷ پس اگر یگنفر مسیح مئن بیسا، یکنه تازه خلقته. هرچی کی کهنه بو ده تمنابو؛ الون همه چی تازه وabo. ۱۸ تموم ایشون خدا جی ایسه کی بواسیطه مسیح امره خوشه همرا اشتی بدا و اشتی خدمته امره بسپارده. ۱۹ یعنی، خدا مسیح مئن دونیا خوشه همرا اشتی دأ و مردوم تقصیراته اوشون حیساب ننا و اشتی خدمته امره بسپارده. ۲۰ پس امه مسیح سفیرون ایسیم، خدا خوشه خواسته امئه طریق اجی انجوم دئه. امه مسیح طرف اجی شمراجی تمنا کونیم کی خدا هما اشتی بوکونین. ۲۱ خدا او کسه کی گوناوه نشناخته، امئه گوناوه چاگوده، تا امه اون مئن خدا صالحی ببیم. ۱ پس او چی مئن کی خدای

همکارون ایسیم، شمراجی خواهش دانیم کی خدای فیضه هچی بدست نارین. ۲ چونکی خدا اشعیای پیغمبر کیتاب مئن گونه:

۶ «مناسب وقت مئن، تا آوجا بدام، و نجات روز مئن، تی یاور بوبوم.»
ایسه، الون خدا مناسب وقته؛ ایسه، الون نجات روز ایسه.

بولس سختین

۳ امه هیچ سنگی هیکس رای مئن توندئنیم، تا هیچ عیبی امئه خدمت مئن دنبون، ۴ بلکی هر کاری کی کونیم نشون دئنیم کی خدای خدمتکارونیم: تاب و تحمل همرا مصیبتون مئن، سختن و بلائان مئن، ۵ چو خوردنون زمت، زیندونون مئن، ولوله ثان مئن، بیگاری مئن، شؤ بی خوئین مئن و گوشنگی مئن نوشون دئنیم کی خدا خدمتکارون ایسیم؛ ۶ پایی همرا، دونایی همرا، صبر همرا، مهربونی همرا، روح القدس همرا، محبت بی ریا همرا، ۷ راستگویی همرا، خدا قوت همرا، صالحی سلاحون همرا که امئه چپ دست و راست دست مئن دره، ۸ عزت و خواری مئن، و بهتون و تعریف مئن، امئه همرا دغلبازون جور برخورد بنه، با ای حال راستگو ایسیم، ۹ امئه همرا بی نوم و نوشونون مورشون رفتار بنه، با ای حال بشناخته بوبوریم، امئه همرا بمرده ثان مورشون رفتار بنه، با ای حال بینین، هنده زیندهیم؛ امئه همرا جوری رفتار بنه کی اینگار مجازات مئن دریم، با ای حال حله بکوشته نوبویم؛ ۱۰ امئه همرا غمگینون مورشون رفتار بنه، با ای حال همیشک شادیم؛ امئه همرا ندارون مورشون رفتار بنه، با ای حال خیلئنه پولداراکونیم، امئه همرا یک جور رفتار بنه کی اینگار هیچی ندانیم، با ای حال صاحب

پولس خوشحال

۷ امره شيمئه ديل مئن جا بدین. امه هيکس حق مئن بدی نوديم، هيکسه خرابانوديم و هيکس اجی سو ايستفاده نوديم. ^۳ مو اينه نوگونم تا شمره محکوماکونم چونکی پيشرت شمره بوتم که امئه ديل مئن جا دانين تا همدیگر همرا بميريم و همدیگر هما زيندگی بوکونيم. ^۴ مو ديل و جرات هما شيمئه همرا گب زئدرم. شمره خیلی ايفتخار کونم. مو خیلی تسلی دانم. می تموم مصيبتون مئن، شادی جی پورم.

^۵ چونکه حتی وقتی که امه مقدونية فارسيم، امئه تن ايستراحت نوده، بلکه هر ور اجی امه مصيبت مئن دبیم، بيرين دعوا مرافعه داشتيم و ديل مئن ترس. ^۶ ولی او خدایي کی بشکسه ديلون تسلی دئنه، امره تيتوس امان همرا تسلی بدا. ^۷ و نه هچی تيتوس امان همرا، بلکه او تسلی همرا کی تيتوس شمراجی بپاته بو. تيتوس شيمئه حسرت اجی، غصه و غیرتی کی شمه مئبه دانين، مئه خبر بارده اوجور کی مو ويشته خوشحالابوم.

^۸ چونکه حتی اگر مو می نومه اجی شمره غمگيناگودم، می بوده کار اجی پشيمون نئم- با ای که انی پشيمون بوم- اين واسی کی اينم می او نومه، شمره غمگيناگوده، هرچند هچی انی زمون- ^۹ ولی الون خوشحالم، نه اين واسئه کی غمگينابونين، بلکه شيمئه ای غمگینی، باعیث بوبو کی توبه بوکونين. چونکی شيمئه غم خدا واسی بو، تا هيچ ضرری امراجی شمره نرسه. ^{۱۰} چونکه او غمی کی خدا واسی ببون، باعیث توبه بنه، کی سراخر نجاته ختم بنه و پشيمونی

همه چی ايسيم. ^{۱۱} ای قرنتس مردوم، امه رک شيمئه همرا گب بزيم و امئه ديله شيمئه واگوديم. ^{۱۲} امه امئه محبته شمراجی مضايقه نوديم بلکه شمه ايسين کی شيمئه محبته امراجی مضايقه بودين. ^{۱۳} شيمئه همرا زاكون جور گب زئتم؛ شمram شيمئه ديله امئه واكونين.

خدای زينده معبد

^{۱۴} بی ايمونون پيشكاوول جیر نشين، چونکی صالحی و شرارت همدیگره چی ربطی دانن و نور و ظلمت چی رفاقتی دانن؟ ^{۱۵} مسيح و بليلعالي یعنی شیطون چی سازشی دانن و مؤمين و کافر چی شباهتی دانن؟ ^{۱۶} خدا معبد بتون هما چی سازشی دانه؟ چونکه امه خدای زينده معبد ايسيم. اوجور کی خدا تورات و پيغمبرون کيتابون مئن گونه:

«مو اوشون مئن ايسنم

و اوشون مئن راه شنم

و مو اوشون خدا بنم

و اوشون می مردوم بن.»

^{۱۷} پس، خداوند گونه:

«ايشون مئن اجی بيرين باين و ايشون اجی سيوا بين.

و هيته نجيس چئه دس نزين

هو زمت شمره به گرمی قبول کونيم.»

^{۱۸} «و مو شيمئه پئر بنم

و شمه می پسون و دترو بنين

خداوند قادر مطلق اينه گونه.» ^۱ پس ای

عزيزون، ايسه که امه ای وعده ثانه دانيم باين امره هرته جسم و روح ناپاکي جی پکاكونيم و خدا ترس همرا، مقدس بؤنه به کمال برسونيم.

شریک ببون. ^۵ ایشون نه فقط اوجور که امه اینتظار داشتیم بلکی اول خوشونه خداوند ئبه وقف بودن و بازین مطابق خدا ایراده خوشونه امئبه وقفاگودن. ^۶ هین واسئه، امه تیتوس اچی بخواستیم هوطو کی خودش پیشتر اولی قدمونه ویته بو، الونم او کار خیره شیمئه مئن کامیل تمناکونه. ^۷ ولی اوجور که همه چی مئن سرتین، ایمون مئن، گب زئن مئن، دونای مئن، بی ریای مئن و شیمئه محبت نسبت به امه-پس ای کار خیر مئنم همه کس اچی سرتربین.

^۸ مو اینه شیمئه حکم نوکونم، بلکی خانم بواسیطه دیگران غیرت ثابت بوکونم کی شیمئه محبت بی ریا ایسه. ^۹ چونکه امئه خداوند عیسی مسیح فیض اچی واخوین که هرچند دولتمند بو، شیمئه واسی ندارابو تا شمه اون نداری مئن دولتمندابین.

^{۱۰} مو می نظره ای جریون باره گونم: ای به نفع شمه ایسه، پارسال، شمه نه هچی ای کار خیر انجوم دان مئن، بلکه اون انجوم دان ذوق و شوق مئنم پا پیش بنابین. ^{۱۱} پس الون ای کاره تمناکونین، تا ذوق و شوق کی ای کار ئبه داشتن، اون تمناگودن شیمئه تونون مالی هما جور ببون. ^{۱۲} چونکه اگر ذوق و شوق ببون، او ادم پیشکش مطابق او چی کی دانه قبولابنه، نه مطابق او چی کی ندانه. ^{۱۳} چونکه امئه منظور ای ننه کی دیگران آسایش مئن بیسن و شمه فشار مئن، بلکی خانیم منصفونه ببون، ^{۱۴} کی الون شیمئه فراوونی، اوشون احتیاجاته برطرفاکونه تا یک روز اوشون فراوونی شیمئه احتیاجاته برطرفاکونه تا ایطوری اینصاف برقرار ببون. ^{۱۵} هوطو کی تورات مئن بنویشته بوبو: «او کی کم زیاد جیماگوده بو، ایضافه نداشت، و او کی کم جیماگوده بو، کم و کسر نداشت.»

ندانه. ولی غمی کی دونیا واسی ایسه، سراخر مردنه ختم بنه. ^{۱۱} چونکی بینین ای غم کی خدا واسی بو چی شوق شیمئه مئن به بار بارده: البته هی شوقه کی نشون دئه تقصیرکار نین، چی غیظ مئن، چی ترس مئن، چی ناجه مئن، چی غیرت مئن، چی مجازات مئن، هر طرف اچی ثابت بودین که او قضیه مئن بی تقصیر بین. ^{۱۲} پس هرچند کی ای نومه شیمئه بنویشتم ولی نه او آدم ئبه کی بدی بوده یا نه او آدم ئبه که اون سر بدی بوبو، بلکی این واسئه بو کی خدا محضر مئن شیمئه او غیرت که امئه دانین آشکار ببون. ^{۱۳} این واسی امه تسلی دانیم. بعلاوه امئه تسلی، امه، تیتوس دئن هما ویشته شادابویم، چونکه اون روح شمه همه ته به تازه بوبو. ^{۱۴} چونکی مو اون ورجه هر نظر اچی شمره ایفتخار بودم و شمه مأ شرمندانه نودین. بلکه هر او چی کی شمره بوتیم درست بو، ثابت بوبو که امئه ایفتخار تیتوس ورجه بجا بو. ^{۱۵} هر دفا کی تیتوس شمه همه ته فرمون بردنه یادابئنه کی چوطو ترس و لرز هما اونه قبول گودین، شمره ویشتر دیل دبدنه. ^{۱۶} خوشحالم کی تموم و کمال شمره ایطمینون دانم.

تشویق گودن به دست و دیلبازی

برارون، امه خانیم شمره او فیض مئن کی خدا مقدونیه کلیساخانه هدا، واخوباکونیم. ^۱ چونکه اوشون مصیبت واسی، سخت ایمتحون بوبون، ولی بی حد و حیساب شادن و با ای کی خیلی نداری مئن ایسان، ولی دس دیل بازن. ^۲ چره کی مو شاهیدم کی خوشون تونونه اندی حتی اون اچی ویشتر پا پیش بنان. ^۳ خیلی امره بی ریا میننت بودن و بخواستن ای خدمت مئن کی مقدسین شئه

پولس تیتوس سفارشہ کونہ

۱۶ ولی خدا شکر کونم کہ او غیرتی کی مو شیمئہ دانم تیتوس دیل مئن نی ہننا۔
 ۱۷ چونکہ اون نہ فقط امئہ خواستہ قبول ہوئے، بلکی خودش ذوق و شوق زیاد ہمارا، این واسی کی شیمئہ ورجہ با پا پیش بنا۔ ۱۸ امہ یکتہ دہ برارہ تیتوس ہمارا سرادئیم کہ انجیل موعظہ بہ تموم کلیساان مئن سرشناسہ۔ ۱۹ و نہ ہچی ای، بلکہ او برار کلیساان اجی تعیین بوبو تا ای کار خیر کہ اون انجوم دان و ایدارہ گودن امئہ وظیفہ امئہ ہمارا ہمسفر ببون۔ او کاری کی خداوند جلال واسئہ و امئہ خیرخواہئہ نوشون دئئہ۔ ۲۰ امہ خیلی پانیم ای خدمت مئن کی پیشکشون جیماگودنہ، کی دیل اجی و بواسیطہ امہ ایدارہ بنہ، ہیکس امئہ سر عیب نئئہ۔ ۲۱ چونکی تقلا کونیم نہ فقط خداوند نظر مئن، بلکی مردوم دید مئنم او چئہ کی خوبہ انجوم بدیم۔ ۲۲ و ایشون ہمارا امئہ برارہ سرادئیم، کی خیلی اونہ امتحون بودیم و بفہمسیم کی خیلی چئن مئن ذوق و شوق دانہ، ولی ایسہ او برار او ایطمینون زیاد خاطیری کی شمرہ دانہ ویشتر از قبل ذوق و شوق دانہ۔ ۲۳ تیتوس بارہ خا بوگوم کہ او خدمت مئن کی شمرہ کادرہ می شریک و ہماکار ایسہ۔ و امئہ برارون بارہ نی خان بوگوم کہ اوشون کلیساان سرآدرؤن و مسیح جلال ایسن۔ ۲۴ پس شیمئہ محبت و ایفتخاری کی شمرہ کونیم کلیساان محضر مئن ای آدمون ثبہ ثابت بوکونین۔

پیشکشون اورشلیم مسیحی ئن ثبہ

۹ ایسہ دہ احتیاج نئہ کی ای خدمت بارہ مقدسین ثبہ، شیمئہ بنویسم۔ ۲ چونکی دونم ای کار ثبہ چی ذوق و شوقی دانین و

این واسی ئم مقدونیہ ایموندارون ورجہ شمرہ ایفتخار بودم۔ ایشونہ بوتم کی شمہ اخائہ ولایت مئن پارسال تا ایسہ پیشکش ہدان ثبہ حاضرین بین۔ و شیمئہ غیرت خیلی از اوشونم ای کار ثبہ تحریک بوئے۔ ۳ ولی ای برارونہ سرادئیم تا ثابت ببون کہ امئہ ایفتخار شمرہ ای جریون بارہ ہچی نبو، بلکی ہوطو کی بوتم، حاضرین بین۔ ۴ نبون کہ اگر چن نفر از مقدونیہ ایموندارون می ہما بان و بفہم کی شمہ حاضرین بین، امہ او ایطمینون اجی کی شمرہ داشتیم شرمندہ ببیم، دئہ این اجی کی شمہ خودتون چنی شرمندہ خا بین ہیچی نوگونم۔ ۵ پس واجیب بدئم برارون اجی بخام کی جلوتر شیمئہ دئن ثبہ بان و او پیشکشونئہ کی وعدہ بدابون، تدارک بینن۔ تا ای پیشکش، پیشکشی ببون کی شیمئہ میل ہمارا ہدایین، نہ زور ہمارا۔

۶ می گب اینہ: ہرکی کم بکارہ، کم بینہ، و ہرکی پور بکارہ، پورم بینہ۔ ۷ ہرکس خا ہو اندی کی خوشہ دیل مئن تصمیم بیتہ ہدئہ، نہ بی میلی و زور ہمارا، چونکی خدا اونئہ کی شادی ہما پیشکش ہدئہ دوست دانہ ۸ و خدا تینہ ہرتہ نعمتہ شیمئہ زیاداکونہ تا ہمیشک ہمہ چی مئن شیمئہ احتیاج اندی بدارین، و ہرتہ خورم کار مئن فت و فراوون بدارین۔ ۹ ہوتو کی زبور کیتاب مئن بنویشتہ بوبو:

«دس و دیل بازی ہمارا ندارونہ ببخشئہ،

اون صالحی تا ابد پابرجا ایسہ۔»

۱۰ او کی دئہ کشاورز ثبہ و نون خوردن ثبہ ہدئہ، شیمئہ دئہ کشت و کار واسی حاضرراگودہ، برکت دئہ و شیمئہ صالحی محصولہ زیاداکونہ۔ ۱۱ شمہ ہر نظر اجی دولتمند بنین تا ہر طرف اجی دست و دیل باز

ايسه، او ادم خا بودونه هيڤو كه او مسيح شى ايسه، امرام مسيح شى ايسيم.^۸ چونكه حتى اگر اننى ويشتر مى ايقتداره ايقتخار بوكونم شرمنده نيم. او ايقتدار كى خداوند، شيمئه بنا گودن ئبه ما هدا نه شيمئه نابودى به.^۹ نخانم ايڤو بنظر با كى مو خانم مى نومه ئان اجى شمره بترسونم،^{۱۰} چونكى گونن: «اون نومه ئان سخت و سنگينه، ولى رو به رو ضعيفه و اون گب زئن به حيساب نانه»^{۱۱} بوگذار او كى ايڤو گونه بفهمه هر او چى كى وقتى نيسام و مى نومه مئن گونم او زمت كى بام او كاره كونم.^{۱۲} نه اى كه امه جرأت كونيم امره اوشون جرگه اجى بحيساب باريم كى خوشون اجى تعريف كونن يا خوشونه كس كس هما مقايسه كونن. ولى او موقع اوشونى كه خوشونه كس كس هما سبك سنگين كونن و خوشونه كس كس هما مقايسه كونن، نفهمن.^{۱۳} ولى امه بيش از حد ايقتخار نوكونيم، بلكى فقط هو قدر ايقتخار كونيم كى خدا امئه معين بوده، او حد كه حتى شمرام در بر گينه.^{۱۴} چونكه امه امئه لنگه امئه حد اجى ويشته درازانوديم اوجور كى اينگار هرگى شمره خدمت نوديم چره كه امه اول ته كسونى بيم كى مسيح انجيله شمره برسونيم.^{۱۵} امه امئه حده دانيم و ديگرون زحمت بكشتر اجى ايقتخار نوكونيم. ولى امه اميد دانيم كه هرچى شيمئه ايمون ويشتر پيلله بنه امئه خدمت حد شيمئه مئتم خيلى پيلترابون،^{۱۶} تا بوتونيم انجيله او ولايتون مئن كى شمراجى دوره موعظه بوكونيم. چونكى نخانيم او كار ئبه كى پيشتر يك نفر ده، خوشه سامؤنسر مئن بوده ايقتخار بوكونيم.^{۱۷} بوگذارين هر كس ايقتخار كونه خداونده ايقتخار بوكونه.^{۱۸} چون او كى خودش خوشاجى تعريف كونه مورد قبول نئه

ببين، و شيمئه اى دست و ديل بازى بواسيطه امه خدا شكر گودن ئبه ختم بنه.
^{۱۲} چونكى اى خدمت، نه فقط مقدسين احتياجاته برطرفاكونه، بلكى باعيث بنه خيلئن خدا بى حد و حيساب شكر بوكونن.^{۱۳} اى خدمت واسى مردوم خدا جلال دئن، چونكى شمه نه فقط اعتراف كونين مسيح انجيله ايمون دانين بلكه اوشون و ديگرونه او چى مئن كى دانين شريك كونين.^{۱۴} هيڤورم خدا پيله فيض واسى كى شيمئه سر هenna، اوشون شمره ذوق و شوق همرا دعا كونن.^{۱۵} خداونده او پيشكش واسى كى گوته شا نئه شكر كونم.

پولس خوشه خدمت اجى دفاع كونه

۱. مو، پولس، خودم مسيح فروتنى و نرمى همرا شمره ميننت كونم-مى كى خيلى از شمه گونين وقتى شيمئه ورجه ايسام سربچيرم و او زمت كى شيمئه ورجه نيسام جسورم!^۲ مو شمره ميننت كونم او زمت كى شيمئه ورجه هنم مجبور نبوم شيمئه همرا جسارت اجى رفتار بوكونم، اوجور كى بعضى مردوم خيال كونن كه امه آدمى فيكرون همرا رفتار كادريم.^۳ چونكه هرچند جسم مئن زيندى كونيم ولى مطابق جسم نوكونيم.^۴ چره كه امئه جنگ اسلحه ئان جسم اجى نئه، بلكى خدا قوته دانه تا قلعه ئانه نابوداكونه.^۵ امه هر بحثى و هر كسيه كى خدا دؤنابى ضد پيله پيله نظر دئه از بين بئنين و فيكرية مجبوراكونيم كى مسيح جى اطاعت بوكونه.^۶ او موقع كى مسيحه تموم و كمال اطاعت كادرين امه آمادهيم كه هر نا اطاعتيه تنبيه بوكونيم.

^۷ نياكونين، بينين شيمئه چوشم جلو چى هenna. اگر يه كس ايظمينون دانه كى مسيح شى

برطرفاگودن. و مو هيچ رقم باری شيمئه كول سه نئابوم و نننم. ^{۱۰} مسيح او حقيقت سر قسم کی می دورين هenna، هيکس اخائيه منطقه مئن ای ايفتخاره مآجي نگينه. ^{۱۱} و چره؟ يعني ای کی شمره دوست ندانم؟ خدا دونه کی دانم! ^{۱۲} و کارئه کی کادرم ايدامه دئنم تا اوشونه کی ايدعا کونن خانن اوجور که امه خدمت کونيم خدمت بوکونن و اين اجی ايفتخار کونن، هيچاکونم. اوشون اجی کی سعی کونن تا خوشونه او چی مئن که اونئبه گولاز کونن امئه همرا مساوی بوکونن.

^{۱۳} چونکی ای جور ادمون، دورؤغ رسولون و دغلباز کارگرونن کی خوشونه مسيح رسولون مورشون چاکونن. ^{۱۴} و ای عجيب نئه چونکی شيطونم خوشه فريشته نور موسون چاکونه. ^{۱۵} پس تعجب نانه که اون خدمتکارونم خوشونه صالحون خدمتکارون مورشون چاکونن. سراخه اوشون، او مجازاتئه که اوشون حقه گيئن.

بولس عذابون

^{۱۶} هنده گونم: هيکس مآ نادون نودونه ولی اگر ايطو کونين ناقلن يکته نادون ادم مورشون مآ قبول بوکونين تا منم بوتونم اننی گولاز بوکونم. ^{۱۷} وقتی مو ای جور ايظمينون همرا می ايفتخار اجی گونم، خداوند طرف اجی نوگونم، بلکی نفهمی جی گونم. ^{۱۸} اوره اجی کی خيلن آدمی فيکر همرا خوشونه گولاز کونن، منم گولاز خا بوکونم. ^{۱۹} نه کی خودتون عاقيلين، اين واسی شمه نفهمونه، شادی هما تحمل کونين! ^{۲۰} چونکه اگر يگ نفر شمره خوشه غولؤم چاکونه يا ای کی شمره فبره

بلکه او ادم مورد قبوله کی خدا اون اجی تعريف بوکونه.

بولس و رسولون

۱۱ کاش شمه می اننی نادونی مئن مآ تحمل بوده بی، مآ تحمل بوکونين! ^۲ چونکی مو شيمئه سر غيرت دانم و ای غيرت خدا ياجی ايسه، چونکی مو شمره يکته مرد هما يعني مسيح نومزد بودم، تا يکته پاک باکره مورشون شمره اون دست بسپارم. ^۳ اما ترسنم هيظو کی ميلون حوا گول بزئه، شيمئه فيکرم از صاف و صادقی و خلوص همرا کی نسبت به مسيح دانين منحرف ببون. ^۴ چونکه اگر يک کس شيمئه ورجه با و يکته عیسی جوز او عیسی که امه شمره اعلوم بوديم اعلوم بوکونه يا اگه شمه يکته روح جوز روح القدس کی هيتين هگيرين يا اگر يکته انجيل پيغوم جوز او انجيل پيغوم کی قبول بوده بين قبول بوکونين شمه راحت اونه تحمل کونين. ^۵ راس راسه گمون نوکونم کی مو او پيله رسولون اجی يکچی کم بدارم. ^۶ حتی اگر گب زنن مئن ماهير نبوم دونايی مئن هيچی کم ندانم، راس راسی امه هر بابت اجی اينه، همه چی مئن شيمئبه روشنناگوديم.

^۷ مگر گوناوه بودم کی مآ کوچيکاگودم تا شمه سربولند ببين، چونکی خدا انجيل پيغومه موفتی شيمئبه اعلوم بودم؟ ^۸ مو ديگر کليسا ئانه چپؤ بودم و اوشون اجی کومک مالی هيتم تا شمره خدمت بوکونم. ^۹ و ای زمت کی شيمئه مئن ايسابوم و محتاج بوم هيکس كول سر هيچ باری نئابوم، چون او برارون کی مقدونيه ولايت اجی بمابون می احتياجاهه

دونه کی دوروغ نوگونم. ۳۲ دمشق شهر مئن، او حاکیم که حارث شاه معین بوده، نگهبونونی دمشق شهر سر بنا تا ما گیرفتاراکونن. ۳۳ ولی ما یکتہ زبیل مئن بنان و یکتہ درجیک اجی کی شهر حیصار مئن دبو، جیر سرادان و ایطو بوبو که اوشون چیکال اجی دریوشوم.

پولس رویائان و اون جسم تموش

۱۲ مو خا هیطو ایفتخار بوکونم. هرچند که اون اجی هیچ منفعتی نیبئم، الون می ایفتخاره رویائان و خداوند مکاشفات گوتن اجی ایدامه دئئم. ۲ یک نفره مسیح مئن شناسنم، کی چهارده سال پیش سوم آسمون برده بوبو-نودونم تن مئن یا تن اجی بیرین، خدا دونه. ۳ و مو دونم کی ای آدم بهیشت برده بوبو-نودونم تن مئن یا تن اجی بیرین، خدا دونه. ۴ و او چیزونی بشتؤسه کی نشانه گوتن، که ادم ثبه خوب ئئه اوشون باره گب بزنه. ۵ مو ایجور ادم ثبه ایفتخار کونم، اما خودم باره جوز ضعفونی کی دانم ایفتخار نوکونم. ۶ هرچند اگه بخام ایفتخار بوکونم، نادون ئئم، چونکه حقیقته گوته درم؛ اما ای کار اجی دوری کونم تا نبون کی یک کس خیال بوکونه مو او چی جی کی می مئن اینه و ما جی ایشؤنه پیلہ ترم. ۷ پس این واسئه ای پیلہ مکاشفات کی بی حد و اندازه نی ایسه، ما مغرورانو کونه، یکتہ تموش می جسم مئن ما هدا بوبو، یعنی شیطون سرادا، تا ما عذاب بدئه و نوگذاره کی مو مغرور بوم. ۸ خداوند اجی هی جریون ثبه سو دفا خواهش بودم کی اینه ما جی ویگیره، ۹ ولی خداوند ما بوتہ: «می فیض تئبه وسسه، چونکی می قدرت، ضعفون مئن کامیلا بنه.» پس، این واسی مو قبل اجی ویشتر شادی همرا می ضعفون ثبه ایفتخار خانم گودن تا مسیح قدرت می سر

یا شمراجی سو ایستفاده بوکونه، یا خوشه شمراجی سرت ر بودونه، یا شیمئه دیمه سلی بزنه، تاب ابئنین.

۲۱ شرمندگی همرا هخان بوگوم که امه ای کار ثبه خیلی ضعیف بیم! ولی اگه یگ نفر جرأت بداره یکتہ جریون ثبه گولاز بوکونه-مو هنده نادونون جور گب زئدرم- منم ما جرأت دئئم او جریون ثبه گولاز بوکونم.

۲۲ اوشون عیرونی ئن؟ منم ایسم. اوشون ایسرائیلی ئن منم ایسم. اوشون ابراهیم زاکونن؟ منم ایسم. ۲۳ اوشون مسیح خدمتکارونن؟ مو اوشون اجی ویشترم-تورون موسون گب زئدرم! همه کس اجی سختتر کار بودم، خیلی ویشته زیندون بوشوم، همه کس اجی ویشته چو بوخوردم، پور پور مرگ مزه واپیشتم. ۲۴ یهودئن اجی پنج دفا سی و نه ته شلاق بوخوردم. ۲۵ سه دفا ما چو بزئن. یک دفا سنگسار بوبوم. سه دفا سفر مئن می کشتی دمرده، یکتہ شبنده روز دریا دبوم. ۲۶ او سفرون مئن کی تترج شوم، روبرون خطر مئن، دوزون خطر، خطری کی می مردوم اجی داشتم، غیریهودئن خطر، خطر شهر مئن، خطر بیابون مئن، خطر دریا مئن، خطری کی دورؤگکو برارون اجی داشتم، ۲۷ سختی و تنگوم مئن، خیلی شوؤن کی بی خوئی بکشتم، گوشنگی و تشنگی مئن، خیلی وقتون بی غذا بوم، سرما مئن ایسابوم و لوخت و سوخت بوم. ۲۸ علاوه بر ایشون تموم کلیسائان نگرونی باره کی می کول سر سنگینی کونه. ۲۹ کیسه کی ضعیف بیون و مو ضعیف نبوم؟ کیسه کی گراخوره و مو نسوجم؟

۳۰ اگر خان گولاز بوکونم، او چئن ثبه گولاز کونم کی می ضعفه نشون دئئه. ۳۱ خدا، خداوند عیسی پئر، کی تا ابد اونه سپاس گونم،

امه خدا محضر مئن اوشون مورشون گب
زئيم کي مسيح مئن درن، اي عزيزون هر او
چي کي کونيم، شيمئه ايمون بنا گودن واسئه.
٢٠ چونکي مو ترسمن شيمئه ورجه بام و
اوجور کي اينتظار دانم شمره نينم، و شمرام
اوجور کي اينتظار دانين ما نينين -شايد
شيمي مئن جنگ و جدال، حسودي، غيظ،
دوشمنگيري، بهتون، غيبت، غرور و هرکي
هرکي بيون. ٢١ و اون ترسم دانم کي وقتي هنده
شيمئه ورجه بام، مي خدا شيمئه جلو ما فروتن
بوکونه و مو مجبور ببوم بعضئن واسي کي
قبلا گوناوه بوده بون و خوشون ناپاکی جي، بي
حيائي و خوشگودروني جي توبه نودن، عزاداري
بوکونم.

آخرتہ ايخطارون

١٣ اي سومين دفا کي شيمئه دئن ټبه
هنم. «هر گبي کي بزئه بنه، دوتہ
يا سوتہ شاھيد اجي ثابت بنه» ٢ مو دومي
مرتبہ که اوره ايسابوم، اوشوني کي پيشتر گوناوه
بوده بون، و بقيه ايخطار بدابوم و الونم که
اوره نيسام هنده ايخطار دئنم که اگہ دومرتہ
شيمئه ورجه بام اوشونه رحم نوکونم. ٣ چونکي
شمه يکته دليل دومبال درين کي ثابت بوکونين
مسيح بواسيطه مو گب زئنه. مسيح در برابر
شمه ضعيف نئه، بلکي شيمئه مئن قوي ايسه.
٤ چون هرچند او ضعف مئن مصلوبابو، ولي
خدا قوت همرا زينديگي کادره. چونکي امرام اون
مئن ضعيفيم، ولي در برابر شمه، اون همرا
خدا قوت اجي زينديگي خانيم گودن.
٥ شمره محک بزئين، تا بينين ايمون دانين يا
نه. شمره ازमित بگيرين. يا مگہ اينه خودتون
باره نفهمين کي عيسي مسيح شيمئه مئن دره؟
-مگہ اي کي اي ايمتchon مئن رداين! ٦ اميد

قرار بگيره. ١٠ پس مسيح خاطيري، ضعفون،
فحشون، سختئن، آزار و اذئت و بلائان مئن،
راضيئم. چون وقتي ضعيفم، پس قوي ايسم.
١١ مو يکته نادون بوم! شمه ما
مجبور اگودين چونکي خاسي ما جي تعريف
بوکونين. چون هرچند کي هيچي نئم، اما اي
پيله رسولون اجي هيچي کم ندانم. ١٢ يکته
حقيقي رسول نوشونه ئان، نهايت صبر و
تحمل هما شيمئه مئن آشکارابو، نشونه
ئان و معجزات و کاروني کي قدرت همرا
ايسه. ١٣ چونکي چي مئن الباقي کلیسا ئان
اجي کمتر شمره لطف بوبو جوز اي کي مو
خودم يکته بار شيمئه کول سر نبوم؟ مي اي
خطا ببخشين!

١٤ الون سومين مرتبه به حاضيرم شيمئه دئن
واسي بام، و هيچ باري شيمئه کول سه ننئم.
چره کي شيمئه مال و مينال دومبال دنئم بلکي
خودتونه خانم. چونکي زاكون وظيفه نئه کي
خوشون پئر و مار ټبه مال و مينال جيماکونن،
بلکي پئر و مار وظيفه ايسه. ١٥ مو ذوق همرا
شيمئه جون ټبه خرج کونم و مي جونم ننئم.
اگر مو شمره ويسته دوست دانم، مگر شمه
خا ما کمه دوست بدارين؟

١٦ ولي با اي کي قبول دانين مو باري شيمئه
کول سر ننام لا بود گونين حيله گرم و حيله اجي
شمره بدست بارد. ١٧ مگر بواسيطه هرته
از اوشون کي شيمئه ورجه سرادام شمر اجي
منفعت بيرد؟ ١٨ مو تيتوس اجي خواهش
بودم کي شيمئه ورجه با و امئه برارم اون هما
سرادام. مگر تيتوس شمر اجي منفعتي بيرده؟
مگہ امه يکته روح مئن عمل نوکونيم؟ مگر
کس کسون همرا يکته را نوشويم؟

١٩ مگر تا ايسه ايطو گمون بودين که امه
تقلا کونيم شيمئه جلو امرا جي دفاع بوکونيم؟

سراخر

۱۱ سراخرہ، ای برارون، شاد ببین. شیمئہ فیکر ای بیون کہ از سر قوت بگیرین، کس کسونه تسلی بدین، کس کس ہمرا ہمرا بیین، صلح و سلامتی مئن زندگی بوکونین؛ و خدای محبت و صلح و سلامتی، شیمئہ ہما مونہ.

۱۲ مقدس موچی ہمرا ہمدیگرہ سلام بوگوین. ۱۳ مقدسین ہمہ تہ، شمرہ سلام رسونئن.

۱۴ خداوند عیسی مسیح فیض و خدا محبت و روح القدس رفاقت، شیمئہ ہمہ تہ ہمرا بیون.

دائم اینہ بفہمین کہ امہ ای ایمتحون مئن ردانوبویم. ۷ ولی امہ خدا محضر مئن دعا کونیم کی خطا نوکونین، نہ ای کی معلوم بیون امہ ای ایمتحون اچی سریولند بیرین بمایم، بلکی شمه او چئہ کی درست ایسہ، بوکونین، حتی اگر ایطو نوشون بدئہ کہ امہ ردایویم. ۸ چونکہ امہ مننیم ہیچ کاری حقیقت ضید بوکونیم، بلکہ ہر او چی کی کونیم حقیقت واسی ایسہ. ۹ چون او زمت کہ امہ ضعیف ببیم و شمه قوی، ای امرہ شاداكونہ و امئہ دعا اینہ کی شمه از سر قوت بگیرین. ۱۰ ہین واسئہ مو ای چیزونہ وقتی شیمئہ ور نیسام شیمئہ نیویسنم، تا وقتی کی شیمئہ ورجہ انم مجبور نبوم می اختیار ہمرا توندی ہمرا رفتار بوکونم، او اختیار کی خداوند بنا گودن ثبہ مأ ہدا، نہ خراب گودن ثبہ.

